

摘藻堂四庫全書薈要

史部

欽定四庫全書薈要

史部

舊五代史卷二十四至  
七

詳校官內閣侍讀孫球



欽定四庫全書薈要卷五千四百二十五

舊五代史卷二十四

宋門下侍郎參知政事監修國史薛居正等撰

書第二十四

列傳十四

李珣字公度隴西燉煌人五世祖忠懿公愷有大節見  
唐史父穀仕懿僖朝官至右諫議大夫珣聰悟有才學  
尤工詞賦僖宗朝晉公王鐸提兵柄鎮滑臺穀居賓席

鐸見珽大賞歎之年二十四登進士第解褐授校書郎  
拜監察御史俄丁內艱先是父旅殯在遠家貧無以襄  
事與弟琪當臘雪以單縗扶杖銜哀告人由是兩克遷  
柩而珽日不過食一溢恒羸卧喪廬中不能興大為時  
賢所歎憂閔再徵為御史以瘠不起成汭之鎮荊州辟  
為掌書記踰時乃就天復中淮寇大舉圍夏口逼巴陵  
大祖患之飛命成汭率水軍十萬援于鄂珽入言曰今  
舳艫容介士千人載稻倍之緩急不可動吳人剽輕若

為所絆則武陵武安皆我之讎也將有後慮不如遣驍將屯巴陵大軍對岸一月不與戰則吳寇糧絕而鄂州圍解矣洎性剛決不聽淮人果乘風縱火舟盡焚兵盡溺洎亦自沈于江朗人潭人遂入荆渚一如所料未幾襄帥趙匡凝復奏為掌記入為左補闕又明年太祖為元帥以襄陽貳于已率兵擊破之趙匡凝奔揚州太祖復署珽為天平軍掌書記一日大會將佐指珽曰此真書記也滄州節度使劉守文拒命太祖引兵十餘萬圍

之久而未下乃召珽草檄珽即就外次筆不停綴登時而成大為太祖嗟賞受禪之歲宰臣除為考功員外郎知制誥珽揣太祖未欲首以舊僚起拜清顯三上章固辭優詔褒允尋以本官監曹州事曹去京數舍吏民豪猾前後十餘政未有善罷者珽在任期歲衆庶以寧入為兵部郎中宗政院學士未幾以許帥馮行襲疾甚出為許州留後先是行襲有牙兵二千皆蔡人也太祖深為憂乃遣珽馳往以伺察之珽至傳舍召將吏親加撫

慰行襲欲使人代受詔珽曰東首加朝服禮也乃于卧  
内宣詔令善自補養苟有不諱子孫俱保後福行襲泣  
謝遂解二印以授珽代掌軍府事太祖覽奏曰予固知  
珽必辦吾事行襲門戶不朽矣乃以珽為匡國軍留後  
尋徵為左諫議大夫兼宣徽副使從征至魏縣過内黃  
因侍立于行廐太祖顧曰此何故為内黃珽曰河南有  
外黃小黃故此有内黃又曰外黃小黃在何處對曰秦  
有外黃都尉理外黃有故壩今在雍丘小黃為高齊所

廢其故壙今在陳留太祖稱獎數四及庶人友珪篡位  
除右散騎常侍充侍講學士內討之日軍士大擾珽為  
亂兵所傷其夕卒于洛陽珽性孝友與弟珙有敦睦之

愛為搢紳所稱

案歐陽史有裴迪韋震傳  
今原文已佚無可采補

盧曾字孝伯其先范陽人也頗好書有所執守始為齊  
州防禦使朱瓊從事瓊降預其謀與之皆來瓊沒太祖  
辟為宣義幕職曾性忠狷好貢直又不能取容于衆每  
勲府譙語稍洽曾率然糾正輒又忤旨左長直軍使劉



捍委任方重會亦不能平冀王友謙初定陝府命會往  
議事有使院小將從行嗜酒荒逸過度會復命欲發其  
罪致疏于袖中累日未果言小將恐事洩先誣告會使  
酒幾敗軍事劉捍因證之由是罷職歸于齊之別墅俄  
而王師範起兵叛太祖促召會謂之曰子能緩頰說青  
州使無背盟吾不負子矣會持檄以往既至青師範囚  
之送于淮南遇害後太祖暴師範之罪曰喪我骨肉殺  
我賓僚遂族誅之因召會二子皆授以官

孫隲滑臺人嗜學知書微有辭筆唐光啓中魏博從事公乘億以女妻之因教以牋奏程式時中原多難文章之士縮影竄跡不自顯億既死魏帥以章表牋疏淹積兼月不能發一字或以隲為言即署本職主奏記事累遷職自支使掌記至節度判官奏官自校書御史郎官中丞檢校常侍至兵部尚書太祖御天下念潛龍時隲奉其主好問往來數十返甚錄之開平三年除右諫議大夫滿歲遷左散騎常侍隲雅好聚書有六經漢史洎

百家之言凡數千卷皆簡翰精至披勘詳定得暇即朝夕耽翫曾無少怠乾化二年春太祖將議北巡選朝士三十餘人扈從二月甲子車駕發自洛陽禺中次白馬頓召文武官就食以從臣未集駐驂以俟之又命飛騎促於道而騶與諫議大夫張衍兵部郎中張儁等累刻方至太祖性本卞急因茲大怒並格殺於前墀

張儁字彥臣祖父咸有聞於時儁少孤自修飾善為五言詩其警句頗為人所稱唐廣明中黃巢犯京師天子

幸蜀士皆竄伏窟穴以保其生儁亦晦跡浮泛不失其道及僖宗還京師由校書郎西畿尉登朝為御史補闕起居郎司勳員外萬年縣令以事黜官峽中將十年太祖即位用宰臣薛貽矩為鹽鐵使儁與貽矩同年登第甚知其才即奏為鹽鐵判官遷職為禮部郎中兼職如故乾元二年二月扈從後至與孫騰張衍同日遇禍於白馬頓

張衍字玄用河南尹魏王宗奭之猶子也其父死於兵

間衍樂讀書為儒始以經學就舉不中選時諫議大夫  
鄭徽退居洛陽以女妻之遂令應辭科不數上登第唐  
昭宗東遷以宗奭勲力隆峻衍由校書郎拜左拾遺旋  
召為翰林學士太祖即位罷之特拜考功郎中俄遷右  
諫議大夫衍巧生業樂積聚太祖將北伐頗以扈從間  
糜耗力用繫意屢干託宰執求免是行太祖微聞之又  
屬應召稽晚與孫隲等同日遇禍

杜荀鶴池州人

辛文房唐才子傳荀鶴字彥之牧之微子也

善為詩辭句切

理為時所許既擢第復還舊山

唐才子傳荀鶴嘗謁梁王朱全忠與之坐忽無

雲而雨王以為天泣不祥命作詩稱意王喜之荀鶴寒  
進連敗文場甚苦至是送春官大順二年裴贄侍郎放  
第八人登科正月十日放榜正荀鶴生朝也王希羽獻  
詩曰金榜曉懸生世日玉書潛記上昇時九華山色高  
千尺未必高於第八枝又唐新纂云荀鶴舉進士及第  
東歸過夷門獻梁太祖詩句云四海九州空第一不同  
諸鎮府封王是則荀鶴之受知於梁祖  
舊矣不待田頔之箋問而始被遇也

時田頔在宣州

甚重之頔將起兵乃陰令以箋問至太祖遇之頗厚及  
頔遇禍太祖以其才表之尋授翰林學士主客員外郎  
既而恃太祖之勢凡搢紳間已所不悅者日屈指數

將謀盡殺之苞蓄未及泄丁重疾旬日而卒

羅隱

唐才子傳  
字昭諫

餘杭人詩名于天下尤長於詠史然多

所譏諷以故不中第大為唐宰相鄭畋李蔚所知隱雖

負文稱然貌古而陋畋女幼有文性嘗覽隱詩卷諷誦

不已畋疑其女有慕才之意一日隱至第鄭女垂簾而

窺之自是絕不詠其詩唐廣明中因亂歸鄉里節度使

錢鏐辟為從事開平初太祖以右諫議大夫徵不至魏

博節度使羅紹威密表推薦乃授給事中年八十餘終

於錢塘

澗泉日記云唐光啟三年吳越王表薦為錢塘令遷著作郎辟掌書記天祐三年充判官梁開

平二年授給事中三年遷發運使是年卒葬於定山鄉金部郎中沈崧銘其墓有文集數卷行

於世

唐才子傳云隱所著諒書說本淮海寓言湘南應

用集甲乙集外集啟事等並行於世

五代史補

羅隱在科場恃才傲物尤為公卿所惡故六舉不第時長安有羅尊師者深于相術隱以貌陋恐為相術所棄每與尊師接談常自大以沮之及其累遭黜落不得已始往問焉尊師笑曰貧道知之矣但以吾子決在一第未可與語今日之事貧道敢有所隱乎且吾子之於一第也貧道觀之雖首冠羣英亦不過簿尉爾若能罷舉東歸霸國以求用則必富且貴矣兩途吾子宜自擇之隱懵然不知所措者數日隣居有賣飯媪見隱驚曰何辭色之沮喪如此莫有不決之事否隱謂知之因盡以尊師之言告之媪歎曰秀才何自迷甚焉且天下皆



知道隱何須一第然後為得哉不如急取富貴則老嫗之願也隱聞之釋然遂歸錢塘時錢鏐方得兩浙置之幕府使典軍中書檄其後官給事中初隱罷上中書之日費窘因抵魏謁鄴王羅紹威將入其境先貽書叙其家世鄴王為姪幕府僚吏見其書皆怒曰羅隱一布衣爾而姪視大王其可乎紹威素重士且曰羅隱名振天下王公大夫多為所薄今惠然肯顧其何以勝得在姪行為幸多矣敢不致恭諸公慎勿言於是擁旆郊迎一見即拜隱亦不讓及將行紹威贈以百萬他物稱是仍致書於鏐謂叔父鏐首用之

仇殷不知何郡人也開平中仕至欽天監明於象緯歷數藝術精密近無其比光化中太祖在滑遣密王友倫以兵三萬禦幽州之師十餘萬深慮其不敵召殷問曰

陣可行乎曰其十四日過禺中乎又問之曰賊敗塗地  
又曰既望當見捷書果如其言不失晷刻太祖之在長蘆  
也諸將請攻壁號令軍中人負橐二圍寘千積俄而雲  
集殷曰何用或以所謀告之殷曰我占矣不見攻壁象  
無乃自退乎翼日有騎馳報丁會以潞州叛太祖令盡  
焚其橐而還不克攻開平中殷一日朝罷過崇政院使  
敬翔直閣翔問之曰月犯房次星其逼若綴是何祥也  
曰常度耳殷欲不言既過數步自度不可默乃反言曰

三兩日當有不順語至無或驟恐宜先白上知既二日  
陝府奏同州劉知俊閉關作叛初王景仁之出師也殷  
上言太陰虧不利深入太祖遽遣使止之已敗於栢鄉  
矣殷所見觸類如是不可備錄然而畏慎特甚居常寢  
默未嘗敢顯言縱言事跡惟其語音不可盡曉以故屢  
貽責罰後卒於官

段深不知何許人開平中以善醫待詔於翰林時太祖  
抱疾久之其溲甚濁僧曉微侍藥有微賜紫衣師號錫

賚甚厚頃之疾發曉微剥服色去師號因召深問曰疾  
愈復作草藥不足恃也我左右粒石而効者衆矣服之  
如何深對曰臣嘗奉詔診切陛下積憂勤失調護脉代  
芢而心益虛臣以為宜先治心心和平而溲變清當進  
飲劑而不當粒石也臣謹按太倉公傳曰中熱不溲者  
不可服石石性精悍有大毒凡餌毒藥如甲兵不得已  
而用之非有危殆不可服也太祖善之令進飲劑疾稍  
愈乃以幣帛賜之



舊五代史卷二十四

舊五代史卷二十四攷證

梁列傳十四李珽傳河南有外黃小黃○小黃歐陽史  
作下黃攷因學紀聞云五代通錄李珽曰河南有外  
黃小黃漢地理志陳留有小黃下黃縣五代史記改  
小黃為下黃誤也當從通錄

秦有外黃都尉○都尉原本作郡尉今據漢書地理志  
及歐陽史改正

充侍講學士○案歐陽史作侍講

盧曾傳始為齊州防禦使朱瓊從事。○案新唐書通鑑與是書梁紀皆稱朱瓊為齊州刺史惟此傳作防禦使疑有舛誤

孫薦傳並格殺於前墀。○案通鑑攷異引梁實錄作賜死通鑑作撲殺於前墀

杜荀鶴傳旬日而卒。○案唐才子傳荀鶴以天祐元年卒北夢瑣言作梁受禪後拜翰林學士五日而卒未知孰是



羅隱傳羅隱餘杭人。○案澗泉日記作新城人。

因亂歸鄉里。節度使錢鏐辟為從事。○案唐新纂羅隱初為吳令。後以羅紹威薦為錢鏐所辟。據是書則隱自歸里。即為鏐從事。後復為紹威薦也。與新纂異。

仇殷傳殷上言太陰虧不利深入。太祖遽遣使止之。已敗於栢鄉矣。○案北夢瑣言云栢鄉狼狽。梁祖亦自咎曰。違犯天道。不取仇殷之言也。此云太祖遽遣使止之。與北夢瑣言異。

舊五代史卷二十四攷證

欽定四庫全書薈要卷五千四百二十六

舊五代史卷二十五

宋門下侍郎叅知政事監修國史薛居正等撰

唐書第一

武皇紀上

太祖武皇帝諱克用本姓朱耶氏其先隴右金城人也  
始祖拔野唐貞觀中為墨離軍事從太宗討高麗薛延  
陀有功為金方道副都護因家于瓜州太宗平薛延陀

諸部于安西北庭置都護屬之分同羅僕骨之人置沙  
陀都督府蓋北庭有磧曰沙陀故因以為名焉永徽中  
以拔野為都督其後子孫五世相承曾祖盡忠貞元中  
繼為沙陀府都督既而為吐蕃所陷乃舉其族七千帳  
徙于甘州盡忠尋率部衆三萬東奔俄而吐蕃追兵大  
至盡忠戰歿祖執宜即盡忠之長子也收合餘衆至于  
靈州德宗命為陰山府都督元和初入為金吾將軍遷  
蔚州刺史代北行營招撫使

新唐書沙陀傳元和三年  
盡忠歿靈州塞詔處其部

鹽州置陰山府以執宜為府兵馬司朝長安授特進金  
吾衛將軍從攻鎮州進蔚州刺史破吳元濟授檢校刑  
部尚書長慶初破賊深州入朝留宿衛拜金吾  
衛將軍太和中授陰山府都督代北行營招撫使莊宗即

位追謚為昭烈皇帝廟號懿祖烈考國昌本名赤心唐

朔州刺史咸通中討龐勛有功入為金吾上將軍賜姓

李氏名國昌

代州有唐故龍武軍統軍檢校司徒贈太保麗西李公神道碑云公諱國昌字德興

仍係鄭王房出為振武節度使尋為吐渾所襲退保于

神武川及武皇鎮太原表為代北軍節度使中和三年

薨莊宗即位追謚為文皇廟號獻祖武皇即獻祖之第

三子也母秦氏以大中十年丙子歲九月二十二日生  
于神武州之新城在姪十三月載誕之際母艱危者竟  
夕族人憂駭市藥于雁門遇神叟告曰非巫醫所及可  
馳歸盡率部人被甲持旄擊鉦鼓躍馬大噪環所居三  
周而止族人如其教果無恙而生是時虹光燭室白氣  
充庭井水暴溢武皇始言喜軍中語齟齬善騎射與儕  
類馳騁嬉戲必出其右年十三見雙鳧翔于空射之連  
中衆皆臣伏新城北有毗沙天王祠祠前井一日沸溢

未察禍福武皇莫曰天王若有神奇可與僕交談奠酒未  
已有神人披金甲持戈隱然出於壁間見者大驚走惟  
武皇從容而退繇是益自負獻祖之討龐勛也武皇年  
十五從征摧鋒陷陣出諸將之右軍中目為飛虎子賊  
平獻祖授振武節度使武皇為雲中牙將嘗在雲中宿  
于別館擁妓醉寢有俠兒持刃欲害武皇及突入曲室  
但見烈火熾赫於帳中俠兒駭異而退又嘗與達靼部  
人角勝達靼指雙鵬于空曰公能一發中否武皇即彎

弧發矢連貫雙鷗邊人拜伏及壯為雲中守捉使事防禦使支謨與同列晨集解舍因戲升郡閣踞謨之座謨亦不敢詰乾符三年朝廷以段文楚為代北水陸發運雲州防禦使時歲薦飢文楚稍削軍食諸軍咸怨武皇為雲中防邊督將部下爭訴以軍食不充邊校程懷素王行審蓋寓李存璋薛鐵山康君立等即擁武皇入雲州衆且萬人營于關雞臺城中械文楚出以應于外諸將列狀以聞請授武皇旄鉞朝廷不允徵諸道兵以討



之乾符五年黃巢渡江其勢滋蔓天子乃悟其事以武  
皇為大同軍節度使檢校工部尚書冬獻祖出師討党  
項吐渾赫連鐸乘虛陷振武舉族為吐渾所擄武皇至  
定邊軍迎獻祖歸雲州雲州守將拒關不納武皇略蔚  
朔之地得三千人屯神武川之新城赫連鐸晝夜攻圍  
武皇昆弟三人四面應賊俄而獻祖自蔚州引軍至吐  
渾退走自是軍勢復振天子以赫連鐸為大同軍節度  
使仍命進軍以討武皇乾符六年春朝廷以昭義節度

使李鈞克北面招討使將太原之師過石嶺關屯于代  
州與幽州李可舉會赫連鐸同攻蔚州獻祖以一軍禦  
之武皇以一軍南抵遮虜城以拒李鈞是冬大雪弓弩  
弦折南軍苦寒臨戰大敗奔歸代州李鈞中流矢而卒  
廣明元年春天子復命元帥李涿率兵數萬屯代州  
武皇令軍使傅文達起兵于蔚州朔州刺史高文集與  
薛葛安慶等部將縛文達送于李涿六月李涿引大軍  
攻蔚州獻祖戰不利乃率其族奔于達旦部居數月吐

渾赫連鐸密遣人賂達旦以離間獻祖既而漸生猜阻  
武皇知之每名其豪右射獵于野或與之百步馳射馬  
鞭或以懸針樹葉為的中之如神由是部人心伏不敢  
竊發俄而黃巢自江淮北渡武皇椎牛醢酒饗其酋首  
酒酣喻之曰予父子為賊臣讒間報國無由今聞黃巢  
北犯江淮必為中原之患一日天子赦宥有詔徵兵僕  
與公等向南而定天下是予心也人生世間光景幾何  
曷能終老沙堆中哉公等勉之達旦知無留意皆釋然

無間是歲十一月黃巢寇潼關天子令河東監軍陳景

思為代北起軍使收兵破賊十二月黃巢犯長安僖宗

幸蜀陳敬思與李友金發沙陀諸郡五千騎南赴京師

友金即武皇之族父也

通鑑友金初與高文集並降于李琢故得與陳景思南赴京師

中和元年二月友金軍至絳州將渡河刺史瞿稹謂陳

景思曰巢賊方盛不如且還代北徐圖利害四月友金

旋軍鴈門瞿稹至代州半月之間募兵三萬營于崞縣

之西其軍皆北邊五部之衆不閑軍法瞿稹李友金不

能制友金謂景思曰興大衆成大事當威名素著則可以伏人今軍雖數萬苟無善帥進亦無功吾兄李司徒父子去歲獲罪于國家今寄北部雄武之略為衆所推若驃騎急奏召還代北之人一麾響應則妖賊不足平也景思然之促奏行在天子乃以武皇為鴈門節度使

仍令以本軍討賊

新唐書王重榮傳重榮懼黃巢復振憂之與楊復光計復光曰我世與李

克用共憂患其人忠不顧難死義如己若乞師焉事幾不濟乃遣使者約連和

李友金發五百

騎齎詔召武皇于達靼武皇即率達靼諸部萬人趨鴈

門五月整兵二萬南嚮京師太原鄭從謹以兵守石嶺  
關武皇乃引軍出他道至太原城下會大雨班師于鴈  
門中和二年八月獻祖自達旦部率其族歸代州十月  
武皇率忻代蔚朔達旦之軍三萬五千騎赴難于京師  
先移檄太原鄭從謹拒關不納武皇以兵擊之進軍至  
城下遣人齎幣馬遺從謹從謹亦遣人饋武皇貨幣饗  
餼軍器武皇南去自陰地趨晉絳十二月武皇至河中  
中和三年正月晉國公王鐸承制授武皇東北面行營

都統武皇令其弟克修領前鋒五百騎渡河視賊黃巢  
遣將米重威齎重賂及偽詔以賜武皇武皇納其賂以  
給諸將燔其偽詔是時諸道勤王之師雲集京畿然以  
賊勢尚熾未敢爭鋒及武皇將至賊帥相謂曰鴉兒軍  
至當避其鋒武皇以兵自夏陽濟河二月營于乾坑店  
黃巢大將尚讓林言王璠趙璋等引軍十五萬屯于梁  
田坡翼日大軍合戰自午及晡巢賊大敗是夜賊衆遁  
據華州武皇進軍圍之巢弟黃鄴黃揆固守三月尚讓

引大軍赴援武皇率兵萬餘逆戰于零口巢軍大敗武皇進軍渭橋翼日黃揆棄華州而遁王鐸承制授武皇鴈門節度使檢校尚書左僕射四月黃巢燔長安收其餘衆東走藍關武皇進收京師七月天子授武皇金紫

光祿大夫檢校左僕射河東節度使

舊唐書僖宗紀五月制以鴈門以北

行營節度忻代蔚朔等州觀察處置等使檢校尚書左僕射代州刺史上柱國食邑七百戶李克用檢校司空同平章事兼太原尹北京留守充河東節度管内觀察處置等使新唐書沙陀傳云收京師功第一進同中書門下平章事隴西郡公未

幾以克用領河東節度

是時武皇既收長安軍勢甚



雄諸侯之師皆畏之武皇一目微眇故其時號為獨眼  
龍是月武皇仗節赴鎮遣使報鄭從謹請治裝歸朝武  
皇次于郊外因往赴鴈門寧覬獻祖八月自鴈門赴鎮  
河東時年二十有八十一月平潞州表其弟克修為昭  
義節度使潞帥孟方立退保于邢州十二月許帥田從  
異汴帥朱溫徐帥時溥陳州刺史趙犇各遣使來告以  
巢蔡合從凶鋒尚熾請武皇共力討賊中和四年春武  
皇率蕃漢之師五萬自澤潞將下天井闕河陽節度使

諸葛爽辭以河橋不完仍屯兵于萬善數日移軍自河  
中南渡趨汝洛四月武皇合徐汴之師破尚讓于太原  
斬獲萬計進攻賊于西華賊將黃鄴棄營而遁是夜大  
雨巢營中驚亂乃棄西華之壘退營陳州北故陽里五  
月癸亥大雨震電平地水深數尺賊營為水所漂而潰  
戊辰武皇引軍營于中牟大破賊于王滿渡庚午巢賊  
大至濟汴而北是夜復大雨賊黨驚潰武皇營于鄭州  
賊衆分寇汴境武皇渡汴遇賊將渡而南半濟擊之大

敗之臨陣斬賊將李周王濟安陽景彪等是夜賊大敗  
殘衆保于昨縣寬旬大軍攝之黃巢乃携妻子兄弟千  
餘人東走武皇追賊至于巢州是月班師過汴汴帥迎  
勞于封禪寺請武皇休于府第乃以從官三百人及監  
軍使陳景思館于上源驛是夜張樂陳宴席汴帥自佐  
饗出珍幣侑勸武皇酒酣戲諸侍妓與汴帥握手叙破  
賊事以為樂汴師素忌武皇乃與其將楊彥洪密謀竊  
發彥洪于巷陌連車樹柵以扼奔竄之路時武皇之從

官皆醉俄而仗兵竊發來攻傳舍武皇方大醉譟聲動地從官十餘人捍賊侍人郭景銖滅燭扶武皇以茵幕裹之匿于牀下以水洒面徐曰汴帥謀害司空武皇方張目而起引弓抗賊有頃烟火四合復大雨震電武皇得從者薛鐵山賀回鶻等數人而去雨水如澍不辨人物隨電光登尉氏門縋城而出得還本營監軍陳景思大將史敬思竝遇害武皇既還營與劉夫人相向慟哭詰旦欲勒軍攻汴夫人曰司空比為國家討賊赴東諸

侯之急雖汴人謀害自有朝廷論列若反戈攻城則曲在我也人得以為辭乃收軍而去馳檄于汴帥汴帥報曰竊發之夜非僕本心是朝廷遣天使與牙將楊彥洪同謀也武皇自虎牢關西趨蒲陝而旋秋七月至太原武皇自以累立大功為汴帥怨圖陷沒諸將乃上章申理及武皇表至朝廷大恐遣內臣宣諭尋加守太傅同平章事隴西郡王光啟元年三月幽州李可舉鎮州王景崇連兵寇定州節度使王處存求援于武皇武皇遣

大將康君立安老薛可郭嘏率兵赴之五月鎮人攻無  
極武皇親領兵救之鎮人退保新城武皇攻之斬首萬  
餘級獲馬千匹王處存亦敗燕軍于易州十一月河中  
王重榮遣使來乞師且言邠州朱玫鳳翔李符將加兵  
于己初武皇與汴人構怨前後八表請削奪汴帥官爵  
自以本軍進討天子累遣內臣楊復恭宣旨令且全大  
體武皇不時奉詔天子頗右汴帥時觀軍容使田令孜  
君側擅權惡王重榮與武皇膠固將離其勢乃移重榮

于定州重榮告于武皇武皇上章言李符朱玫挾邪忌  
正黨庇朱溫臣已點檢蕃漢軍五萬取來年渡河先斬  
朱玫李符然後平溫

新唐書王重榮傳詔克用將兵援河中重榮遣克用書且

言奉密詔須公到使我國公此令致朱全忠朱玫之惑上也因示偽詔克用方與全忠有隙信之請討全忠及

致

天子覽表遣使譬喻百端輒傳相望既而朱玫引邠

鳳之師攻河中王重榮出師拒戰朱玫軍於沙苑對壘  
月餘十二月武皇引軍渡河與朱玫決戰玫大敗收軍  
夜遁入于京師時京城大駭天子幸鳳翔武皇退軍于

河中光啟二年正月僖宗駐驛于寶雞武皇自河中遣使上章請車駕還京且言大軍止誅凶黨時田令孜請僖宗南幸興元武皇遂班師朱玫于鳳翔立嗣襄王煬為帝以偽詔賜武皇武皇燔之械其使馳檄諸方鎮遣來使奉表于行在九月武皇遣昭義節度使李克修討孟方立于邢州大敗方立之衆于焦崗斬首數千級以大將安金俊為邢州刺史以撫其降人十月進攻邢州邢人出戰又敗之孟方立求援于鎮州鎮人出兵三萬



以援方立克修班師光啟三年六月河中節度使王重  
榮為部將常行儒所殺武皇表重榮兄重盈為帥七月  
武皇以安金俊為澤州刺史時張全義自河陽據澤州  
及李罕之收復河陽召全義令守洛陽全義乃棄澤州  
而去故以金俊守之文德元年二月僖宗自興元還京  
三月僖宗崩昭宗即位以武皇為開府儀同三司檢校  
太師兼侍中隴西郡王食邑七千戶食實封二百戶河  
南尹張全義潛兵夜襲李罕之于河陽城陷舉族為全

義所擄罕之踰垣獲免遂來歸于武皇遣李存孝薛阿  
檀史儼兒安金俊安休休將七千騎送罕之至河陽汴  
將丁會牛存節葛從周將兵赴援李存孝率精騎逆戰  
于溫縣汴人既扼太行之路存孝殿軍而退騎將安休  
休以戰不利奔于蔡武皇以罕之為澤州刺史遙領河  
陽節度使十月邢州孟方立遣大將奚忠信將兵三萬  
寇遼州武皇大破之斬首萬級生擒奚忠信龍紀元年  
五月遣李罕之李存孝攻邢州六月下磁州邢將馬漑

率兵數萬來拒戰罕之敗之于琉璃陂生擒馬溉徇于城下孟方立恚恨飲酖而死三軍立其姪遷為留後使求援于汴汴將王虔裕率精甲數百入于邢州罕之等班師大順元年遣李存孝攻邢州孟遷以邢洺磁三州降執汴將王虔裕三百人以獻武皇徙孟遷于太原以安金俊為邢洺團練使三月昭義軍節度使李克修卒以李克恭為潞州節度使是月武皇攻雲州拔其東城赫連鐸求援于燕燕帥李匡威將兵三萬以赴之戰于

城下燕軍大敗時徐州時溥為汴軍所攻遣使來求援  
武皇命石君和由兗鄆以赴之五月潞州軍亂殺節度  
使李克恭州人推牙將安居受為留後南結汴將時潞  
之小將馮霸擁叛徒三千騎駐于沁水居受使人召之  
馮霸不至居受懼出奔至長子為村胥所殺傳首于霸  
霸遂入潞州自為留後武皇遣大將康君立李存孝等  
攻之汴將朱崇節葛從周率兵入潞州以固之是時幽  
州李匡威雲州赫連鐸與汴帥協謀連上表請加兵于

太原宰相張濬孔緯贊成其事六月天子削奪武皇官  
爵以張濬為招討使以京兆尹孫揆為副華州韓建為  
行營都虞侯以汴帥為河東南面招討使幽州李匡威  
為河東北面招討使雲州赫連鐸為副汴將朱友裕將  
兵屯晉絳時汴軍已據潞州又遣大將李彥等率軍數  
萬急攻澤州武皇遣李存孝自潞州將三千騎以援之  
汴將鄧季筠以一軍犯陣存孝追擊擒其都將十數人  
獲馬千餘匹是夜李彥收軍而退大軍掩擊至馬牢關

斬首萬餘級追襲至懷州而還存孝復引軍攻潞州八月存孝擒新授昭義節度使孫揆初朝廷授揆節鉞以本軍取刀黃嶺路赴任存孝偵知之引騎三百伏于長子縣崖谷間揆建牙持節褒衣大蓋擁衆而行存孝突出谷口遂擒揆及中使韓歸範并將校五百人存孝械揆等以組練繫之環于潞州遂獻于武皇武皇謂揆曰公搢紳之士安言徐步可至達官何用如是揆無以對令繫于晉陽獄武皇將用為副使使人誘之揆言不遜

遂殺之九月汴將葛從周棄潞州而遁武皇以康君立  
為潞州節度使以李存孝為汾州刺史十月張濬之師  
入晉州遊軍至汾隰武皇遣薛鐵山李承嗣將騎三千  
出陰地闖營于洪洞遣李存孝將兵五千營于趙城華  
州韓建以壯士三百人冒犯存孝之營存孝追擊直壓  
晉州西門張濬之師出戰為存孝所敗自是閉壁不出  
存孝引軍攻絳州十二月晉州刺史張行恭棄城而奔  
韓建張濬由含山路遁去大順二年春正月武皇上章

申理其略曰臣今身無官爵名是罪人不敢歸陛下藩

方且欲於河中寄寓進退行止伏候聖裁天子尋就加

守中書令

歐陽史二月復拜克用河東節度使  
隴西郡王加檢校太師兼中書令

是月魏

博為汴將葛從周所寇節度使羅弘信遣使來求援武

皇出師以赴之三月邢州節度使安知建叛奔青州天

子以知建為神武統軍自棣州沂河歸朝鄆州朱瑄邀斬

于河上傳首晉陽以李存孝為邢州節度使四月武皇

大舉兵討赫連鐸于雲州遣騎將薛阿檀率前軍以進



攻武皇設伏兵于御河之上大破之因塹守其城七月  
武皇進軍柳會赫連鐸力屈食盡奔于吐渾部遂歸幽  
州雲州平武皇表石善友為大同軍防禦使邢州節度  
使李存孝以鎮州王鎔託附汴人謀亂河朔北連燕寇  
請乘雲代之捷平定燕趙武皇然之八月大蒐于晉陽  
遂南巡澤潞略地懷孟河陽趙克裕望風送款請修隣  
好九月蒐于邢州十月李存孝董前軍攻臨城鎮人五  
萬營于臨城西北龍尾崗武皇令李存審李存賢以步

軍攻之鎮人大敗殺獲萬計拔臨城進攻元氏幽州李  
匡威以步騎五萬營于鄆邑以援鎮州武皇分兵大掠  
旋軍邢州

舊五代史卷二十五

舊五代史卷二十五攷證

唐武皇紀上中和三年薨○案新唐沙陀傳作光昌三年國昌卒與是書異

以武皇為大同軍節度使○案歐陽史作拜克用為大同防禦使新唐書作以國昌為大同軍防禦使通鑑作以國昌為大同節度使俱與是書異

復命元帥李涿○案歐陽史作招討使李琢通鑑亦作琢俱與是書異

與薛葛安慶等部將○案新唐書作薩葛首領米海萬  
安慶

天子乃以武皇為鴈門節度使○案新唐書表中和二  
年以河東忻代二州隸鴈門節度更大同節度為鴈  
門節度治代州是中和二年以前鴈門非鎮名也據  
舊唐書初赦克用拜代州刺史忻代兵馬留後二年  
擢鴈門節度神策天寧軍鎮遏忻代觀察使是克用  
為鴈門節度實在二年是書作元年疑誤

十一月平潞州表其弟克修為昭義節度使。○案通鑑克用表克修為昭義軍節度使在四年八月與是書異

汴帥素忌武皇。○案梁紀作李克用乘醉任氣帝不平之攷新唐書沙陀傳亦作全忠忌克用桀邁難制與此紀合蓋全忠攻上源驛實忌其威名而欲害之非徒以其乘醉任氣也

鎮州王景崇。○王景崇舊唐書作王鎔攷藩鎮傳景崇

以中和二年卒子鎔繼立是光啟初寇定州者當為  
王鎔也通鑑從舊唐書

光啟元年三月節度使王處存求援于武皇武皇遣大  
將康君立安老薛可郭嘏率兵赴之五月鎮人攻無  
極武皇親領兵救之○案曲陽天安廟李克用題名  
碑云李克用以幽鎮侵擾中山領蕃漢步騎五十萬  
親來救援時中和五年二月二十一日也至三月十  
七日以幽州請就和斷遂卻班師攷舊唐書中和五

年三月丙辰朔丁卯駕至京師己巳御宣政殿大赦  
改元是三月之十四日己改光啟曲陽去京師遠故  
未知耳又克用親援處存與通鑑遣將康君立異今  
攷是書武皇先遣康君立等與通鑑合繼乃親領兵  
救之與題名碑合惟是書作五月碑作三月微有互  
異耳

乃移重榮于定州○案歐陽史作徙重榮于兗州攷新  
唐書王重榮傳亦云令攷徙重榮兗海節度使與是

書異

武皇上章言李符朱致挾邪忌正。○李符歐陽史作李昌符蓋唐實錄避獻祖諱故去昌字

孟方立恚恨飲酖而死三軍立其姪遷為留後。○案舊唐書昭宗紀歐陽史莊宗紀皆以孟遷為方立之弟新唐書孟方立傳作方立之從弟此紀又作方立之姪未詳孰是

六月天子削奪武皇官爵。○六月新唐書作五月



以張濬為招討使。○案新唐書本紀作張濬為行營都招討宣慰使。張濬傳作河東行營兵馬招討制置使。歐陽史作太原四面行營兵馬都統。

華州韓建為行營都虞候。○案歐陽史作韓建為副使。新唐書張濬傳作韓建為供軍使。

八月存孝擒新授昭義節度使孫揆。○案新唐書作七月戊申李克用執昭義節度使孫揆。通鑑從是書作

八月

張濬之師出戰為存孝所敗 案新唐書帝紀作十一月張濬及李克用戰于陰地敗績歐陽史亦作十一月與是書先後互異

舊五代史卷二十五 攷證

欽定四庫全書薈要卷五千四百二十七

舊五代史卷二十六

宋門下侍郎參知政事監修國史薛居正等撰

唐書第二

武皇紀下

景福元年正月鎮州王鎔恃燕人之援率兵十餘萬攻邢州之堯山武皇遣李存信將兵應援李存孝素與存信不協遞相猜貳留兵不進武皇又遣李嗣勲李存審

將兵援之大破燕趙之衆斬首三萬收其軍實三月武  
皇進軍渡滹沱攻欒城下鼓城橐城四月燕軍寇雲代  
武皇班師八月赫連鐸誘幽州李匡威之衆八萬寇天  
成軍遂攻雲州營於州北連亘數里武皇潛軍入於雲  
州詰旦出騎軍以擊之斬獲數萬李匡威燒營而遁十  
月邢州李存孝叛納款於梁李存信構之也景福二年  
春大舉以伐王鎔以其通好於李存孝也二月攻天長  
鎮旬日不下王鎔出師三萬來援武皇逆戰於叱日嶺

下鎮人敗斬首萬餘級時歲饑軍乏食脯屍肉而食之  
進軍下井陘李存孝將兵夜入鎮州鎮人乞師於汴汴  
帥方攻時溥不暇應之乃求援於幽州李匡威率兵赴  
之武皇乃班師七月武皇討李存孝於邢州遂攻平山  
渡滹水攻鎮州王鎔懼以帛五十萬犒軍請修舊好仍  
以鎮冀之師助擊存孝許之武皇進圍邢州十二月武  
皇狩於近郊獲白兔有角長三寸乾寧元年三月邢州  
李存孝出城首罪繫歸太原輟於市邢洺磁三州平武

皇表馬師素為邢州節度使五月鄆州節度使朱瑄為  
汴軍所攻遣使來乞師武皇遣騎將安福順安福應安  
福遣督精騎五百假道於魏州以應之九月潞州節度  
使康君立以酖死十月武皇自晉陽率師伐幽州初李  
匡儔奪據兄位燕人多不義之安塞軍戍將劉仁恭挈  
族歸於武皇武皇遇之甚厚仁恭數進畫於蓋寓言幽  
州可取之狀願得兵一萬指期平定武皇方討李存孝  
於邢州輟兵數千欲納仁恭不利而還匡儔由是驕怠

數犯邊境武皇怒故率軍以討之是時雲州吐渾赫連  
鐸白義誠並來歸命皆笞而釋之十一月進攻武州甲  
寅攻新州十二月李匡儔命大將率部騎六萬救新州  
武皇選精甲逆戰燕軍大敗斬首萬餘級生獲將領百  
餘人曳練徇於新州城下是夜新州降辛亥進攻媯州  
壬子燕兵復合於居庸關拒戰武皇命精騎以疲之令  
步將李存審由他道擊之自午至晡燕軍復敗甲寅李  
匡儔攜其族棄城而遁將之滄州隨行輜車載獲妓妾

甚衆滄帥盧彥威利其貨以兵攻匡儔於景城殺之盡  
擄其衆丙辰進軍幽州其守城大將請降武皇令李存  
審與劉仁恭入城撫勞居人如故市不改肆封府庫以  
迎武皇乾寧二年正月武皇在幽州命李存審劉仁恭  
徇諸屬郡二月以仁恭為權幽州留後從燕人之請也  
留腹心燕留德等十餘人分典軍政武皇遂班師凡駐  
幽州四十日六月武皇率蕃漢之師自晉陽趨三輔討  
鳳翔李茂貞邠州王行瑜華州韓建之亂先是三帥稱



兵向闕同弱王室殺害宰輔時河中節度使王重盈卒  
重榮之子珂即武皇之子婿也權典軍政其兄珙為陝  
州節度使瑤為絳州刺史與珂爭河中遂訴於岐邠華  
三鎮言珂本蒼頭不當襲位珂亦訴於武皇武皇上表  
保薦珂乞授河中旄鉞詔可之三帥遂以兵入覲大掠  
京師請授王珂同州節度使王瑤河中節度使天子亦  
許之武皇遂舉兵表三帥之罪復移檄三鎮三鎮大懼  
是月次絳州刺史王瑤登陴拒命武皇攻之旬日而拔

斬王瑤於軍門誅其黨千餘人七月次河中王珂迎謁  
於路己未同州節度使王行約棄城奔京師與左軍兵  
士劫掠西市都民大擾行約即行瑜弟也庚申樞密使  
駱全瓘以武皇之軍將至請天子幸右軍指揮使李繼  
鵬茂貞假子也本姓閭名珪與全瓘謀劫天子幸鳳翔  
左軍指揮使王行實亦行瑜之弟也與劉景宣欲劫天  
子幸邠州兩軍相攻縱火燒內門煙火蔽天天子急詔  
鹽州六都兵士令追殺亂兵左右軍退走王行瑜李茂

貞聲言自來迎駕天子懼出幸南山駐蹕於莎城是夜  
熒惑犯心壬戌武皇進收同州聞天子幸石門遣判官  
王瓌奉表奔問天子遣使賜詔令與王珂同討邠鳳時  
武皇方攻華州俄聞李茂貞領兵士三萬至藍屋王行  
瑜領兵至興平欲往石門迎駕乃解華州之圍進營渭  
橋天子遣延王戒丕丹王允齋詔促武皇兵直抵邠鳳  
八月乙酉供奉官張承業齋詔告諭涇帥張鎰已領步  
騎三萬於京西北扼邠岐之路武皇進營渭北遣史儼

將三千騎往石門扈駕遣李存信李存審會鄜延之兵  
攻行瑜之梨園寨天子削奪行瑜官爵以武皇為天下  
兵馬都招討使以鄜州李思孝為北面招討使以涇州  
張鐺為西南面招討使天子又遣延王丹王賜武皇御  
衣及大將茶酒弓矢命二王兄事武皇延王傳天子密  
旨云一昨非卿至此已為賊庭行酒之人矣所慮者二  
凶締合卒難剪除且欲姑息茂貞令與卿修好俟梟斬  
行瑜更與卿商量武皇上表請駕還京令李存節領二千

騎於京西北以防邠賊奔突辛亥天子還宮加武皇守  
太師中書令邠寧四面行營都統時王行瑜弟兄固守  
梨園寨我師攻之甚急李茂貞遣兵萬餘來援行瑜營  
於龍泉鎮茂貞自率兵三萬迫咸陽武皇奏請詔茂貞  
罷兵兼請削奪茂貞官爵詔曰茂貞勒兵蓋備非常尋  
已發遣歸鎮又言茂貞已誅李繼鵬李繼畧卿可切戒  
兵甲無犯土疆武皇請賜河中王珂旌節三表許之又  
表李罕之為副都統十月丙戌李存信於梨園寨北遇

賊軍斬首千餘級自是賊閉壁不出戊子天子賜武皇  
內弟子四人又降朱書御札賜魏國夫人陳氏是月王  
行瑜因敗衄之後閉壁自固武皇令李罕之晝夜急攻  
賊軍乏食拔營而去李存信與罕之等先伏軍於阬路  
俟賊軍之至縱兵擊之殺戮萬計是日收梨園等三寨  
生擒行瑜之子知進並母丘氏大將李元福等二百人  
送赴闕庭庚寅王行約王行實燒劫寧州遁走寧州守  
將徐景乞降武皇表蘇文建為邠州節度使且於寧州

為治所十一月丁巳收龍泉寨時行瑜以精甲五千守之李茂貞出兵來援為李罕之所敗邠賊遂棄龍泉寨而去行瑜復入邠州大軍進逼其城行瑜登城號哭曰行瑜無罪昨殺南北司大臣是岐帥將兵脅制主上請治岐州行瑜乞束身歸朝武皇報曰王尚父何恭之甚耶僕受命討三賊臣公其一也如能束身歸闕老夫未敢專命為公奏取進止行瑜懼棄城而遁武皇收其城封府庫遽以捷聞既而慶州奏王行瑜將家屬五百人

到州界為部下所殺傳首闕下武皇既平行瑜還軍渭  
北十二月武皇營於雲陽候討鳳翔進止乙未天子賜  
武皇為忠貞平難功臣進封晉王加實封二百戶武皇  
復上表請討李茂貞天子不允武皇私謂詔使曰觀主  
上意疑僕別有他腸復何言哉但禍不去胎憂患未已  
又奏臣統領大軍不敢逕赴朝覲遂班師乾寧三年正  
月汴人大舉以攻兗鄆朱瑄朱瑾再乞師於武皇假道  
於魏州羅弘信許之乃令都指揮使李存信將步騎三



萬與李承嗣史儼會軍以拒汴人存信軍於莘與朱瑾合勢頻挫汴軍汴帥患之乃間魏人存信御兵無法稍侵魏之芻牧者弘信乃與汴帥通出師三萬攻存信軍存信揭營而退保於洺州三月武皇大掠相魏諸邑攻李固洹水殺魏兵萬餘人進攻魏州五月汴將葛從周氏叔琮引兵赴援六月李茂貞舉兵犯京師七月車駕幸華州是月武皇與汴軍戰於洹水之上鐵林指揮使落落被擒落落武皇之長子也既戰馬踣於坎武皇馳

騎以救之其馬亦踣汴之追兵將及武皇背射一發而斃乃退九月李存信攻魏之臨清汴將葛從周等引軍來援大敗於宗城北存信進攻魏州十月武皇敗魏軍於白龍潭追擊至觀音門汴軍救至乃退十一月武皇徵兵於幽鎮定三州將迎駕於華下幽州劉仁恭託以契丹入寇俟敵退聽命乾寧四年正月汴軍陷兗鄆騎將李承嗣史儼與朱瑾同奔於淮南三月陝帥王珙攻河中王珂來告難武皇遣李嗣昭率二千騎赴之破陝

軍於猗氏乃解河中之圍至是天子遣延王戒丕至晉

陽傳宣旨於武皇朕不取卿言以及於此苟非英賢竭

力朕何由再謁廟廷在卿表率予所望也七月武皇復

徵兵於幽州劉仁恭辭旨不遜武皇以書讓之仁恭捧

書謾罵抵之於地仍囚武皇之行人八月大舉以伐仁

恭九月師次蔚州戊寅晨霧晦暝占者云不利深入辛

巳攻安寨俄報燕將單可及領騎軍至矣武皇方置酒

高會前鋒又報賊至矣武皇曰仁恭何在曰但見可及

輩武皇張目怒曰可及輩何足為敵仍促令出師燕軍已擊武皇軍寨武皇乘醉擊賊燕軍披靡時步兵望賊而退為燕軍所乘大敗於木瓜澗俄而大風雨震電燕軍解去武皇方醒甲午師次代州劉仁恭遣使謝罪於武皇武皇亦以書報之自此有檄十餘返光化元年春正月鳳翔李茂貞華州韓建皆致書於武皇乞修和好同獎王室兼乞助丁匠修繕秦宮武皇許之四月汴將葛從周寇邢洛磁等州旬日之內三州連陷汴人以葛

從周為邢州節度使大將李存信收軍自馬嶺而旋八月壬戌天子自華還宮是時車駕初復而欲諸侯輯睦賜武皇詔令與汴帥通好武皇不欲先下汴帥乃致書於鎮州王鎔令導其意明年汴帥遣使奉書幣來修好武皇亦報之自是使車交馳朝野相賀九月武皇遣周德威李嗣昭率兵三萬出青山口以迫邢洛十月遇汴將葛從周於張公橋既戰我軍大敗是月河中王珂來告急言王珙引汴軍來寇武皇遣李嗣昭將兵三千以

援之屯於胡壁堡汴軍萬餘人來拒戰嗣昭擊退之十  
二月潞州節度使薛志勤卒澤州刺史李罕之以本軍  
夜入潞州據城以叛罕之報武皇曰薛鐵山新死潞民  
無主慮軍城有變輒專命鎮撫武皇令人讓之罕之乃  
歸於汴武皇遣李嗣昭將兵討之下澤州收罕之家屬  
拘送晉陽光化二年春正月李罕之陷沁州三月汴將  
葛從周氏叔琮自土門陷承天軍又陷遼州進軍榆次  
武皇令周德威擊之敗汴軍於洞渦驛叔琮棄營而遁

德威追擊出石會關殺千餘人汴人復陷澤州五月武  
皇令都指揮使李君慶將兵收澤潞為汴軍所敗而還  
以李嗣昭為都指揮使進攻潞州八月嗣昭營於潞州  
城下前鋒下澤州時汴將賀德倫張歸厚等守潞州是  
月德倫等棄城而遁潞州平九月武皇表汾州刺史孟  
遷為潞州節度使光化三年汴軍大寇河朔幽州劉仁  
恭乞師武皇遣周德威帥五千騎以援之七月李嗣昭  
攻堯山至內丘敗汴軍於沙河進攻洺州下之九月汴

帥自將兵三萬圍洺州嗣昭棄城而歸葛從周設伏於  
青山口嗣昭之軍不利十月汴人乘勝寇鎮定鎮定懼  
皆納賂於汴是時周德威與燕軍劉守光敗汴人二萬  
於望都聞定州王郜來奔乃班師是月天子加武皇實  
封一百戶遣李嗣昭率步騎三萬攻懷州下之進攻河  
陽汴將閻寶率軍來援嗣昭退保懷州天復元年正月  
汴將張存敬攻陷晉絳二州以兵二萬屯絳州以扼援  
路二月張存敬迫河中王珂告急於武皇使者相望於



路珂妻邠國夫人武皇愛女也亦以書至懇切求援武  
皇報曰賊阻道路衆寡不敵救爾即與爾兩亡可與王  
郎棄城歸朝珂遂送款於張存敬三月汴師自大梁至  
河中王珂遂出迎尋徙於汴天子以汴帥兼鎮河中武  
皇自是不復能援京師霸業由是中否四月汴將氏叔  
琮率兵五萬自太行路寇澤潞魏博大將張文恭領軍  
自新口入葛從周領兗鄆之衆自土門入張歸厚以邢  
洺之衆自馬嶺入定州王處直之衆自飛狐入侯言以

晉絳之兵自陰地入氏叔琮康懷英營於澤州之昂車武皇令李嗣昭將三千騎赴澤州援李存璋而歸賀德倫氏叔琮軍至潞州孟遷開門迎沁州刺史蔡訓亦以城降於汴氏叔琮悉其衆趨石會關是時偏將李審建先統兵三千在潞州亦與孟遷降於汴及叔琮之入寇也審建為其鄉導汴人營於洞渦別將白奉國與鎮州大將石公立自井陘入陷承天軍及攻壽陽遼州刺史張鄂以城降於汴都人大恐時霖雨積旬汴軍屯聚既

衆芻糧不給復多痢瘡師人多死時大將李嗣昭李嗣源每夜率驍騎突營掩殺敵衆恐懼五月汴軍皆退氏叔琮軍出石會周德威李嗣昭以精騎五千躡之殺戮萬計初汴軍之將入寇也汾州刺史李瑋據城叛以連汴人至是武皇令李嗣昭李存審將兵討之是歲并汾饑粟暴貴人多附瑋為亂嗣昭悉力攻城三日而拔擒李瑋等斬於晉陽市氏叔琮既旋軍過潞州擄孟遷以歸汴帥以丁會為潞州節度使六月遣李嗣昭周德威

將兵出陰地攻慈隰二郡隰州刺史唐禮慈州刺史張  
瓌並以城來降武皇以汴寇方盛難以兵服佯降心以  
緩其謀乃遣牙將張特持幣馬書檄以諭之陳當時利  
害請復舊好十一月壬子汴帥營於渭濱甲寅天子出

幸鳳翔

新唐書帝如鳳翔李茂貞韓全誨請召克用入  
衛克用問道遣使者奔問並遺書全忠勸還汴

全忠  
不答

武皇遣李嗣昭率兵三千自沁州趨平陽遇汴軍

於晉州北斬首五百級天復二年二月李嗣昭周德威  
領大軍自慈隰進攻晉絳營於蒲縣乙未汴將朱友寧

氏叔琮將兵十萬營於蒲縣之南乙巳汴帥自領軍至  
晉州德威之軍大恐三月丁巳有虹貫德威之營戊午  
氏叔琮率軍來戰德威逆擊為汴人所敗兵仗輜車委  
棄殆盡朱友寧長驅至汾州慈隰二州復為汴人所據  
辛酉汴軍營於晉陽之西北攻城西門周德威李嗣昭  
緣山保其餘衆而旋武皇驅丁壯登陴拒守汴軍攻城  
日急武皇召李嗣昭周德威等謀將出奔雲州嗣昭以  
為不可存存信堅請且入北蕃續圖進取嗣昭等固爭

之太妃劉氏亦極言於內乃止居數日亡散之士復集  
軍城稍安李嗣昭與李嗣源夜入汴軍斬將奪旗敵人  
扞禦不暇自相驚擾丁卯朱友寧燒營而遁周德威追  
至白壁關俘斬萬計因收復慈隰汾等三州天復三年  
正月天子自鳳翔歸京五月雲州都將王敬暉殺刺史  
劉再立以城歸於劉仁恭武皇遣李嗣昭討之仁恭遣  
將以兵五萬來援雲州嗣昭退保樂安燕人擄敬暉棄  
城而去武皇怒笞嗣昭及李存審而削其官是時親軍

萬衆皆邊鄙人動違紀律人甚苦之左右或以爲言武  
皇曰此輩膽略過人數十年從吾征伐比年以來國藏  
空竭諸軍之家賣馬自給今四方諸侯皆懸重賞以募  
勇士吾若束之以法急則棄吾吾安能獨保此乎俟時  
開運泰吾固自能處置矣天祐元年閏四月汴帥迫天

子遷都於洛陽

新唐書帝東遷詔至太原克用泣謂其  
下曰乘輿不復西矣遣使者奔問行在

五月乙丑天子制授武皇叶盟同力功臣加食邑三千  
戶實封三百戶八月汴帥遣朱友恭弒昭宗於洛陽宮

輝王即位告哀使至晉陽武皇南向慟哭三軍縞素天祐二年春契丹按巴堅始盛武皇召之按巴堅領其部族凡三十萬人至雲州與武皇會於雲州之東握手甚歡因結為兄弟旬日而去留馬千匹牛羊萬計期以冬初大舉渡河天祐三年正月魏博既殺牙軍魏將史仁遇據高唐以叛遣人乞師於武皇武皇遣李嗣昭率三千騎攻邢州以應之遇汴將牛存節張筠於青山口嗣昭不利而還九月汴帥親率兵攻滄州幽州劉仁恭遣



使來乞師武皇乃徵兵於仁恭將攻潞州以解滄州之圍仁恭遣掌書記馬郁都指揮使李溥等將兵三萬會於晉陽武皇遣周德威李嗣昭合燕軍以攻澤潞十二月潞州節度使丁會開門迎降命李嗣昭為潞州節度使以丁會歸於晉陽天祐四年正月甲申汴帥聞潞州失守自滄州燒營而遁四月天子禪位於汴帥奉天子為濟陰王改元為開平國號大梁是歲四川王建遣使至勸武皇各王一方俟破賊之後訪唐朝宗室以嗣帝

位然後各歸藩守武皇不從以書報之曰竊念本朝屯  
否巨業淪胥攀鼎駕以長違撫彤弓而自咎默默終古  
悠悠彼蒼生此厲階永為痛毒視橫流而莫救徒誓楫  
以興言別捧函題過垂獎諭省覽周既駭惕異常淚下  
霑衿倍鬱申胥之素汗流浹背如聞蔣濟之言僕經事  
兩朝受恩三代位叨將相籍係宗枝賜鈇鉞以專征徵  
苞茅而問罪麇兵校戰二十餘年竟未能斬新莽之頭  
顧斷蚩尤之肩髀以至廟朝顛覆豺虎縱橫且授任分

憂叨策冒寵龜玉毀櫝誰之咎歟俯閱指陳不勝慚慙  
然則君臣無常位陵谷有變遷或塞長河泥封函谷  
時移事改理有萬殊即如周末虎爭魏初鼎據孫權父  
子不顯授於漢恩劉備君臣自微興於涿郡得之不謝  
於家世失之無損於功名適當逐鹿之秋何惜華蟲之  
服惟僕累朝席寵奕世輸忠忝佩訓詞粗存家法善博  
奕者惟先守道治蹊田者不可奪牛誓於此生靡敢失  
節仰憑廟勝早殄寇讎如其事與願違則共臧洪遊於

地下亦無恨矣惟公社稷元勲嵩衡降祉鎮九州之上  
地負一代之弘才合於此時自求多福所承良訊非僕  
深心天下其謂我何有國非吾節也悽悽孤懇此不盡  
陳五月梁祖遣其將康懷英率兵十萬圍潞州懷英驅  
率士衆築壘環城城中音信斷絕武皇遣周德威將兵  
赴援德威軍於余吾率先鋒挑戰日有俘獲懷英不敢  
即戰梁祖以懷英無功乃以李思安代之思安引軍將  
營於潞城周德威以五千騎搏之梁軍大敗斬首千餘

級思安退保堅壁別築外壘謂之夾寨以抗我之援軍  
梁祖調發山東之民以供饋運德威日以輕騎掩之運  
路艱阻衆心益恐李思安乃自東南山口築夾道連接

夾寨以通饋運自是梁軍堅守夾寨冬十月武皇有疾  
是時晉陽城無故自壞占者惡之天祐五年正月戊子

朔武皇疾革辛卯崩於晉陽年五十三遺令薄葬發喪

後二十七日除服莊宗即位追謚武皇帝廟號太祖陵

在鴈門

五代史補太祖武皇本朱耶赤心之後沙陀部人也其先生於雕窠中酋長以其異生諸族傳

養之遂以諸爺為氏言非一父所養也其後言訖以諸  
為朱以爺為耶至太祖生眇一目長而駿勇善騎射所  
向無敵時為之獨眼龍大為部落所疾太祖恐禍及遂  
舉族歸唐授雲州刺史賜姓李名克用黃巢犯長安自  
北引兵赴難功成遂拜太原節度使封晉王武皇之  
有河東也威聲大振淮南楊行密常恨不識其狀貌因  
使畫工詐為商賈往河東寫之畫工到未幾人有知其  
謀者擒之武皇初甚怒既而親謂曰且吾素眇一目試  
召亟使寫之觀其所謂如何及至武皇按膝厲聲曰淮  
南使汝來寫吾真必畫工之尤也寫吾不及十分即階  
下便是死汝之所矣畫工再拜下筆時方盛夏武皇執  
八角扇因寫扇角半遮其面武皇曰汝謫吾也遽使別  
寫之又應聲下筆畫其臂弓撚箭之狀仍微合一目以  
觀箭之曲直武皇大喜因厚賂金帛遣之五代史闕  
文世傳武皇臨薨以三矢付莊宗曰一矢討劉仁恭汝  
不先下幽州河南未可圖也一矢擊契丹且曰按巴堅

與吾把臂而盟結為兄弟誓復唐家社稷今背約附賊汝必伐之一矢滅朱溫汝能成吾志死無憾矣莊宗藏三矢於武皇廟庭及討劉仁恭命蕃吏以少牢告廟請一矢盛以錦囊使親將負之以為前驅訖旋之日隨俘賊納矢於太廟伐契丹滅朱氏亦如之又武皇眇一目謂之獨眼龍性喜殺左右有小過失必寘於死初諱眇人無敢犯者嘗令寫真畫工即為撫箭之狀微瞋一目圖成而進武皇大悅賜予甚厚

史臣曰武皇肇跡陰山赴難唐室逐豺狼於魏闕殄氛祲於秦州賜姓受封奄有汾晉可謂有功矣然雖茂勤王之績而非無震主之威及朱旗屯渭曲之師俾翠輦有石門之幸比夫桓文之輔周室無乃有所愧乎洎失

援於蒲絳久垂翅於并汾若非嗣子之英才豈有興王之茂業矧累功積德未比於周文創業開基尚虧於魏祖追謚為武斯亦幸焉

舊五代史卷二十六



舊五代史卷二十六攷證

唐書武皇紀下景福元年正月鎮州王鎔恃燕人之援  
率兵十餘萬攻邢州之堯山○案舊唐書作大順二  
年王鎔援邢州屯於堯山攷此時邢州未叛於晉不  
得有王鎔之援師蓋即景福元年事誤移於前一年  
耳歐陽史及通鑑俱與是書同

三月武皇進軍渡滹沱攻藥城下鼓城橐城四月燕軍  
寇雲代武皇班師○案舊唐書作景福元年二月庚

寅太原易定之兵合勢攻鎮州三月克用處存斂軍而退是興師以二月至三月始旋師也通鑑云三月克用王處存合兵攻王鎔癸丑拔天長鎮戊午鎔與戰於新市大破之辛酉克用退屯藥城是進師退師皆在三月也是書作三月進軍四月班師與諸書異十月邢州李存孝叛納款於梁李存信搆之也○案舊唐書大順元年十一月癸丑朔太原將邢州刺史李存孝自恃擒孫揆功合為昭義帥怨克用投康君立

存孝自晉州率行營兵歸邢州據城上表歸朝仍致書張濬王鎔求援今攷是書大順二年存孝始為邢州節度無由於元年冬得據邢州也新唐書歐陽史通鑑並從是書作景福元年十月

武皇表馬師素為邢州節度使○案舊唐書作克用以大將馬師素權知邢洺團練事與是書異

是時雲州吐渾赫連鐸白義誠並來歸○案舊唐書昭宗紀作六月壬辰克用攻陷雲州執赫連鐸新唐書

昭宗紀作六月赫連鐸與李克用戰於雲州死之通鑑從新唐書作克用大破吐谷渾殺赫連鐸擒白義誠俱與是書異攷雲州諸部因討李匡儔而來歸自當在十月而諸書皆作六月恐未足據

甲寅攷新州○案甲寅字誤下文十二月有辛亥壬子甲寅則十一月不得有甲寅也據通鑑攷異蓋薛史仍紀年錄之誤

二月以仁恭為權幽州留後○案舊唐書作乾寧元年

十二月以李匡威故將劉仁恭為幽州兵馬留後歐陽史亦作元年冬事皆因平幽州而終言之未嘗核其年月也通鑑從是書作二年二月

八月乙酉供奉官張承業齎詔告諭○案舊唐書作七月丁卯上遣內官張承業傳詔克用軍與是書日月互異攷通鑑作壬午遣張承業詣克用軍蓋壬午遣使乙酉始至軍耳

武皇上表請駕還京○案舊唐書作壬寅李克用遣子

存貞奉表行在請車駕還京攷當時奉表者即後唐莊宗也莊宗未嘗名存貞舊唐書誤

十一月丁巳○案舊唐書作十一月癸未朔疑不當有丁巳據是書上文十月有丙戌戊子則十一月斷非癸未朔也通鑑所定日月皆從是書

還軍渭北十二月武皇營於雲陽○案歐陽史作晉軍渭北遇雨六十日攷通鑑十二月乙酉李克用軍於雲陽辛亥引兵東歸無緣得有六十日也歐陽史誤

天祐二年春契丹按巴堅領部族三十萬至雲州與武  
皇會於雲州之東○案武皇會契丹於雲州通鑑作  
開平元年新唐書作天祐元年與是書異歐陽史與  
是書同又契丹國志作晉王李存勗與契丹連和會  
於東城殊誤

梁祖以懷英無功乃以李思安代之○案李思安之代  
懷英通鑑作七月事與是書繫五月異

按巴堅舊作阿保機今改

舊五代史卷二十六攷證



欽定四庫全書薈要卷五千四百二十八

舊五代史卷二十七

宋門下侍郎叅知政事監修國史薛居正等撰

唐書第三

莊宗紀一

莊宗光聖神閔孝皇帝諱存勗武皇帝之長子也母曰貞簡皇后曹氏以唐光啟元年歲在乙巳冬十月二十  
二日癸亥生帝于晉陽宮姪時曹后常夢神人黑衣擁

扇夾侍左右載誕之辰紫氣出于窓戶及為嬰兒體貌  
奇特沈厚不羣武皇特所鍾愛及武皇之討王行瑜帝  
時年十一從行初令入覲獻捷迎駕還宮昭宗一見駭  
之曰此兒有奇表因撫其背曰兒將來之國棟也勿忘  
忠孝于予家因賜鸛鵲酒卮翡翠盤

北夢瑣言云昭宗曰此子可亞其父

時人號曰亞子

賊平授檢校司空隰州刺史改汾晉二郡皆遥

領之帝洞曉音律常令歌舞于前十三習春秋手自繕  
寫畧通大義及壯便射騎膽畧絕人其心豁如也武皇

起義雲中部下皆北邊勁兵及破賊迎鑾功居第一由  
是稍優寵士伍因多不法或陵侮官吏豪奪士民白晝  
剽攘酒博喧競武皇緩于禁制唯帝不平之因從容啟  
于武皇武皇依違之及安塞不利之後時事多難梁將  
氏叔琮康懷英頻犯郊圻土疆日蹙城門之外鞠為戰  
場武皇憂形于色帝因啟曰夫盛衰有常理禍福繫神  
道家世三代盡忠王室勢窮力屈無所愧心物不極則  
不反惡不極則不忘今朱氏攻逼乘輿窺伺神器陷害

良善誣誑神祇以臣觀之殆其極矣大人當遵養時晦以待其衰何事輕為沮喪太祖釋然因奉觴作樂而罷及滄州劉守文為梁朝所攻其父仁恭遣使乞師武皇恨其翻覆不時許之帝白曰此吾復振之道也不得以嫌怨介懷且九分天下朱氏今有六七趙魏中山在他廡下賊所憚者唯我與仁恭爾我之興衰繫此一舉不可失也太祖乃徵兵于燕攻取潞州既而丁會果以城來降天祐五年春正月武皇疾篤召監軍張承業大將

吳珙謂曰吾常愛此子志氣遠大可付後事唯卿等所  
教及武皇厭代帝乃嗣王位于晉陽時年二十有四汴  
人方寇潞州周德威宿兵于亂柳以軍城易帥竊議忪  
忪訛言播于行路帝方居喪將吏不得謁見監軍使張  
承業排闥至廬所言曰夫孝在不墜家業不同匹夫之  
孝且君父厭世嗣主未立竊慮兇猾不逞之徒有懷覬  
望又汴寇壓境利我凶衰苟或搖動則倍張賊勢訛言  
不息懼有變生請依顧命墨線聽政保家安親此惟大

孝帝于是始聽斷大事時振武節度使克寧即帝之季父也為管内蕃漢馬步都知兵馬使典握兵柄帝以軍府事讓季父曰兒年幼稚未通庶政雖承遺命恐未能彈壓季父勲德俱高衆情推伏且請制置軍府俟兒有立聽季父處分克寧曰亡兄遺命屬在我兒孰敢異議因率先拜賀初武皇獎勵戎功多畜庶孽衣服禮秩如嫡者六七輩比之嗣王年齒又長部下各縮強兵朝夕聚議欲謀為亂及帝紹統或強項不拜鬱鬱憤惋託疾

廢事會李存顥以陰計于克寧曰兄亡弟立古今舊事  
季父拜姪理所未安克寧妻素剛狠因激怒克寧陰圖  
禍亂存顥欲于克寧之第謀害張承業李存璋等以并  
汾九州歸附于梁送貞簡太后為質克寧意將激發乃  
擅殺大將李存質請授己雲州節度使割蔚朔應三州  
為屬郡帝悉俞允然知其陰禍有日矣克寧俟帝過其  
第則圖竊發時幸臣史敬鎔者亦為克寧所誘盡得其  
情乃來告帝帝謂張承業曰季父所為如此無猶子之

情骨肉不可自相魚肉予當避路則禍亂不作矣承業  
曰臣受命先王言猶在耳存顓輩欲以太原降賊王欲  
何路求生不即誅除亡無日矣因召吳珙李存璋李存  
敬朱守殷諭其謀衆咸憤怒二月壬戌命存璋伏甲以  
誅克寧遂靖其難是月唐少帝崩于曹州梁祖使人酖  
之也帝聞之舉哀號慟三月周德威尚在亂柳梁將李  
思安屢為德威所敗閉壁不出是時梁祖自將兵至澤  
州以劉知俊為招討使以代思安以范君實劉重霸為



先鋒牛存節為撫遏統大軍營于長子四月帝召德威  
軍歸晉陽汴人既見班師知我國禍以為潞州必取援  
軍無俟再舉遂停斥侯梁祖亦自澤州歸洛帝知其無  
備乃謂諸將曰汴人聞我有喪必謂不能興師又以我少  
年嗣位未習戎事必有驕怠之心若簡練兵甲倍道兼  
行出其不意以吾憤激之衆擊彼驕惰之師拉朽摧枯  
未云其易解圍定霸在此一役甲子軍發自太原己巳  
至潞州北黃碾下營五月辛未朔晨霧晦暝帝率親軍

伏三垂崗下詰旦天復昏霧進軍直抵夾城時李嗣源  
總帳下親軍攻東北隅李存璋王霸率丁夫燒寨斫夾  
城為二道用德威李存審各分道進攻軍士鼓譟三道  
齊進李嗣源壞夾城東北隅率先掩擊梁軍大恐南向  
而奔投戈委甲噎塞行路斬萬餘級獲其將副招討使  
符道昭洎大將三百人芻粟百萬梁昭討使康懷英得  
百餘騎出天井關而遁梁祖聞其敗也既懼而歎曰生  
子當如是李氏不亡矣吾家諸子乃豚犬爾初唐龍紀

元年帝纔五歲從武皇校獵于三垂崗崗上有玄宗原  
廟在焉武皇于祠前置酒樂作伶人奏百年歌者陳其  
衰老之狀聲調悽苦武皇引滿捋鬚指帝曰老夫壯心  
未已二十年後此子必戰于此及是役也果符其言焉  
是月周德威乘勝攻澤州刺史王班登城拒守梁將劉  
知俊自晉絳將兵赴援德威退保高平帝遂班師于晉  
陽告廟飲至賞勞有差乃下令于國中禁盜賊恤孤寡  
徵隱逸止貪暴峻隄防寬獄訟晷月之間其俗丕變帝

每出于路遇饑寒者必駐馬而臨問之由是人情大悅  
王霸之業自茲而基矣六月鳳翔李茂貞邠州楊崇本  
合西川王建之師五萬以攻長安遣使會兵于帝帝遣  
張承業率師赴之九月邠岐蜀三鎮復大舉攻長安遣  
李嗣昭周德威將兵三萬攻晉州以應之德威與梁將  
尹皓戰于神山北梁人大敗是時晉之騎將夏侯敬受  
以一軍奔于梁德威乃退保隰州天祐六年秋七月邠  
岐二帥及梁之叛將劉知俊俱遣使來告將大舉以伐

靈夏兼收關輔請出兵晉絳以張兵勢八月帝御軍南  
征先遣周德威李存審丁會統大軍出陰地關攻晉州  
為地道壞城二十餘步城中血戰拒守梁祖遣楊師厚  
領兵赴援德威乃收軍而退

通鑑引莊宗實錄云汴軍至蒙坑德威逆戰敗之斬

首三百級師厚退保絳州是役也小將蕭萬通戰歿師厚進營平陽德威收軍而退

天祐七年秋七

月鳳翔李茂貞邠州楊崇本皆遣師來會兵同討靈夏  
且言劉知俊三敗汴軍于寧州靈夏危蹙岐隴之師大  
舉決取河西帝令周德威將兵萬人西渡河以應之是

役也劉知俊為岐人所構乃自退九月德威班師冬十

月梁祖遣大將李思安楊師厚率師營于澤州以攻上

黨十一月鎮州王鎔遣使來求援是時梁祖以羅紹威

初卒全有魏博之地因欲兼并鎮定遣供奉官杜廷隱

丁延徽督魏軍三千人入于深冀鎮人懼故來告難帝

集軍吏議之咸欲按甲治兵徐觀勝負唯帝獨斷堅欲

救之乃遣周德威率軍屯于趙州是月行營都招討使

丁會卒十二月丁巳朔梁祖聞帝軍屯趙州命寧國軍

節度使王景仁為北面行營招討使韓勅為副相州刺史李思安為前鋒會魏州之兵以討王鎔又令閻寶王彥章率二千騎會景仁于邢洛丁丑景仁營于栢鄉帝遂親征自贊皇縣東下辛巳至趙州與周德威兵合帝令史建瑋以輕騎嘗寇獲芻牧者二百人問其兵數精兵七萬是日帝觀兵于石橋南詰旦進軍距栢鄉一舍周德威史建瑋率蕃落勁騎以挑戰四面馳射梁軍閉壁不出乃退翼日進軍距栢鄉五里遣騎軍逼其營梁

將韓勅李思安率步騎三萬鎧甲炫曜其勢甚盛分道以薄帝軍德威且戰且退距河而止既而德威偵知梁人造浮橋乃退保高邑乙酉致師于栢鄉帝禱戰于先武廟栢鄉無芻粟之備梁軍以樵采為給為帝之游軍所獲由是堅壁不出剉屋茅坐席以秣其馬衆心益恐天祐八年正月丁亥周德威史建瑭帥三千騎致師于栢鄉設伏于村塢間遣三百騎直壓其營梁將怒悉其軍結陣而來德威與之轉戰至高邑南梁軍列陣橫亘



六七里時帝軍未成列李存璋引諸軍陣于野河之上  
梁軍以五百人爭橋鎮定之師與血戰梁軍敗而復整  
者數四帝與張承業登高觀望梁人戈矛如束申令之  
後踔聲如雷王師進退有序步騎嚴整寂然無聲帝臨  
陣誓衆人百其勇短兵既接無不奮力梁有龍驤神威  
拱宸等軍皆武勇之士也每一人鎧仗費數十萬裝以  
組繡飾以金銀人望而畏之自己及午騎軍接戰至晡  
梁軍欲抽退塵埃漲天德威周麾而呼曰汴人走矣帝

軍齊譟以進魏人收軍漸退李嗣源率親軍與史建瑭  
安金全兼北部吐渾諸軍衝陣夾攻梁軍大敗棄鎧投  
仗之聲震動天地龍驤神威神捷諸軍殺戮殆盡自陣  
至栢鄉數十里殭屍枕籍敗旗折戟所在蔽地夜漏一  
鼓帝軍入栢鄉梁軍輜重帳幄資財奴僕皆為帝軍所  
有梁將王景仁韓勅李思安等以數十騎夜遁是役也  
斬首二萬級獲馬三千匹鎧甲兵仗七萬輜車鍋幕不  
可勝計擒梁將陳思權以下二百八十五人帝號令收

軍于趙州既而梁人棄深冀二州而遁初杜廷隱之襲  
深冀也聲言分兵就食時王鎔將石公立戍深州欲杜  
闔不納鎔遽令啟闔命公立移軍于外廷隱遂據其城  
公立既出指城圍而言曰開門納盜後悔何追此城數  
萬生靈生為俘馘矣因投刃泣下數日廷隱閉城殺鎮  
兵數千人遂登陴拒守王鎔方命公立攻之即有備矣  
及栢鄉之敗兩州之人悉為奴擄老弱者皆坑之己亥  
遣史建瑋周德威徇地于邢魏先馳檄以諭之

冊府元  
龜載晉

王諭邢洛魏博衛滑諸郡縣檄天祐八年正月周德威等破賊狗地邢洛先馳檄諭邢洛魏博衛滑諸郡縣曰王室遇屯七廟被陵夷之酷昊天不弔萬民罹塗炭之灾必有英主奮庸忠臣伏順斬長鯨而清四海靖祲以泰三靈予位忝維城在當分閫念茲顛覆詎可寡安故伏威文輔合之規問羿浞凶狂之罪逆溫碭山庸隸巢孽餘凶當僖宗奔播之初我太祖掃平之際束身泥首請命牙門苞藏姦詐之心惟示婦人之態我太祖憐窮鳥曲為開懷特發表章請帥梁汴纔出荏蒲之澤便居茅社之尊殊不感恩遽行猜忌我國家祚隆周漢迹盛伊唐二十聖之鑑基三百年之文物外則五侯九伯內則百辟千官或代襲簪纓或門傳忠孝皆遭陷害永抱沉寃且鎮定兩藩國家巨鎮冀安民而保族咸屈節以稱藩逆溫唯仗陰謀專行不義欲全吞噬先據屬州趙州特發使車來求援助予情惟溫冠義劫親仁躬率賦輿赴茲盟約賊將王景仁將兵十萬屯據柘鄉遂

驅三鎮之師授以七擒之畧鸛鵲繞到梟獍大奔易如  
走坂之丸勢若燎原之火僵尸仆地流血成川組甲雕  
戈皆投草莽謀夫猛將盡作俘囚羣凶既快于天誅大  
慙須垂于鬼錄今則還蒐兵甲簡練車徒乘勝長驅剪  
除元惡凡爾魏博邢洺之衆感恩懷義之人乃祖乃孫  
為聖唐赤子豈徇虎狼之黨遂忘覆載之恩蓋以封豕  
長蛇憑陵薦食無方逃難遂被脅從空嘗膽以銜冤竟  
無門而雪憤既聞告捷想所慰懷今義旅徂征止于招  
撫昔耿純焚廬而向順蕭何舉族以從軍皆審料興亡  
能圖富貴殊勲茂業翼子貽孫轉禍見幾決在今日活  
能詣轅門而效順開城堡以迎降長官則改補官資百  
姓則優加賞賜所經誣誤更不推窮三鎮諸軍已申嚴  
令不得焚燒廬舍剽掠馬牛但仰所在生靈各安耕織  
子恭行天罰罪止元凶已外歸明一切不問凡爾士衆  
咸諒

帝御親軍南征庚子至洺州梁祖令其將徐仁浦

將兵五百夜入邢州張承業李存璋以三鎮步兵攻邢  
州遣周德威史建瑋將三千騎長驅至澶魏帝與李嗣  
源率親軍繼進二月戊午師次洹水周德威進至臨河  
已未魏帥羅周翰出兵五千塞石灰窰口周德威以驍  
騎掩擊迫入觀音門是日王師迫魏州帝舍于狄公祠  
西周翰閉壁自固帝軍攻之其城幾陷帝歎曰予為兒  
童時從先王渡河今其忘矣方春桃花水滿思一觀之  
誰從予者癸亥帝觀河于黎陽是時梁祖發兵萬餘將

渡河聞王師至棄舟而退黎陽都將張從楚曹儒以部下兵三千人來降立其軍為左右匡霸使乙丑周德威自臨清徇地貝郡攻博州下東武朝城時澶州刺史張可臻棄城而遁遂攻黎陽下臨河淇門庚午梁祖在洛聞王師將攻河陽率親軍屯白馬坡壬申帝下令班師帝至趙州王鎔迎謁翼日大饗諸軍壬午帝發趙州歸晉陽畱周德威戍趙州三月己丑鎮定州各遣使言幽州劉守光凶僭之狀請推為尚父以稔其惡乙未帝至

晉陽宮召監軍張承業諸將等議幽州之事乃遣牙將載漢超齎墨制并六鎮書推劉守光為尚書令尚父守光由是凶熾日甚遂邀六鎮奉冊五月六鎮使至幽州

梁使亦集

通鑑攷異引莊宗實錄云三月己丑鎮州遣押衙劉光業至言劉守光凶淫縱毒欲自尊

大請稔其惡以咎之推為尚父乙未上至晉陽宮召張承業諸將等議討燕之謀諸將亦云宜稔其惡上遂令押衙戴漢超持墨制及六鎮書如幽州其辭曰天祐八年三月二十七日天德軍節度使宋瑤振武節度使周德威昭義節度使李嗣昭易定節度使王處直鎮州節度使王鎔河東節度使尚書令晉王謹奉冊進盧龍橫海等軍節度使檢校太尉中書令燕王為尚書令尚父五月六鎮使至汴使亦集六月守光令有司定尚父採



訪使  
議

是月梁祖遣都招討使楊師厚將兵三萬屯邢州  
帝令李嗣昭出師掠相衛而還秋七月帝會王鎔于承  
天軍鎔武皇之友也帝奉之盡敬捧卮酒為壽鎔亦捧  
酒醕帝鎔幼子昭誨從行因許為婚八月甲子幽州劉  
守光潛稱大燕皇帝年號應天九月庚子梁祖將親軍  
自洛渡河而北至相州聞帝軍未出乃止十月幽州劉  
守光殺帝之行人李承勲忿其不行朝禮也十一月辛  
丑燕人侵易定王處直來告難十二月甲子帝遣周德

威劉光潛李嗣源及諸將率蕃漢之兵發晉陽伐劉守  
光于幽州

舊五代史卷二十七

舊五代史卷二十七考證

唐莊宗紀一及武皇之討王行瑜帝時年十一○案歐陽史從是書作十一吳縝纂誤據徐無黨注莊宗年四十三逆推之當以甲辰年生乾寧二年破王行瑜時當云年十二今考五代會要莊宗以光啟元年生年四十二北夢瑣言載莊宗獻王行瑜捷年十一與薛歐二史俱同徐注作年四十三誤

汴將氏叔琮康懷英○案懷英本名懷貞後因避梁末

帝諱始改名懷英是書前後統作懷英今仍其舊  
周德威宿兵于亂柳○案亂柳原本作亂楊考歐陽史  
作亂柳胡三省通鑑注云亂柳在潞州沁留縣界今  
改正

以并汾九州歸附于梁○案并汾九州通鑑作河東九  
州胡三省注云河東領并遼沁汾石忻代嵐憲九州  
附識于此

承業曰臣受命先王○案先王原本作先帝考晉王嗣

位之初武皇尚未追稱為帝今改正

二月壬戌○壬戌原本作丙戌今據通鑑改正

至潞州北黃碾下營○黃碾原本作黃碾通鑑作黃碾  
胡三省注云黃碾村在潞州潞城縣今改正

初唐龍紀元年帝纔五歲○案歐陽史克用破孟方立  
于邢州還軍上黨置酒三垂岡時莊宗在側方五歲  
考克用邢州之役在文德元年今以莊宗生年計之  
當從是書作龍紀元年

周德威乘勝攻澤州刺史王班登城拒守○案通鑑考異引莊宗列傳云李存璋進攻澤州刺史王班棄城而去與是書異


德威乃退保隰州○案通鑑作周德威等聞梁帝將至乙未退保隰州是德威之退師因梁祖之親至也是書不載

距栢鄉五里○五里原本作七里今據歐陽史及通鑑改正

梁軍以五百人爭橋○案通鑑作梁軍橫亘數里競前  
奪橋鎮定步兵禦之勢不能支與此微異  
率親軍屯白馬坡○白馬坡通鑑作白馬阪  
並六鎮書○六鎮原本大鎮今據通鑑改正  
十一月辛丑燕人侵易定○案通鑑作戊申燕主守光  
將兵二萬寇易定是書作辛丑與通鑑異

舊五代史卷二十七考證





總校官編修臣朱鈴

校對官助教臣李巖

謄錄監生臣謝雲